

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 28 (1941)

Artikel: Guardia della Romania
Autor: Cahannes, Gion
DOI: <https://doi.org/10.5169/seals-882320>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 15.03.2025

ETH-Bibliothek Zürich, E-Periodica, <https://www.e-periodica.ch>



Guardia della Romania

Romontsch romontsch ei nies lungatg,
Eviva nossa viarva,
Schiditg che sin nos cuolms il matg
Verdegia nova jarva!

Daveras sco in vivificont suffel de matg tila il moviment romontsch de renaschientscha atras nossas valladas. Bein strusch enzacu ha il tschespet patern demussau ton catsch sco en nos dis. Cun satisfaziun constatein nus en special il cordial beinvegni, ch' il "Tschespet anfla onn per onn en nies pievel.

Nus meïn franc buc en err, sche nus tertgein che bein enqual premurau Romontsch e Romontscha lessen contribuir enzatgei de pli per promover nossa buna litteratura. Quei san els far dond lur num alla

«Guardia della Romania»

Quei ei manegiau aschia:

1. Tgi che fa part della «Guardia della Romania» ei prompts d'acceptar, mintgamai cu' l compara, tschun exemplars dil «Tschespet» (à 2 fr) u, sch'ei vegn giavischau, era digl «Ischi».

2. Quels exemplars ein patertgai sco Tschespets u Ischis de biemaun, en quei senn ch' ils benefactors schenghegian quels a tgi ch' els anflan per bien. Igl ei cussegliivel de rabitschar il cudischet oravon en casas, nua ch'el arrivass schiglioc buc aschi tgunsch.

3. Contas gadas frunta ei per igl onn ora, ch' ins vul dar ad enzatgi ina regurdientscha u pintga renconuschientscha per in survetsch prestau. Cheu se presenta il «Tschespet» sco in pulit biemaun che vegn ad allegrar pign e grond.

4. Il diember de tschun secompona per regla d' exemplars de pliras annadas. Quei vul dir: Aschi prest ch' in niev Tschespet vegn annunziaus ella gasetta, san quels della «Guardia» far de saver agl «Archivariat della Romania» a Mustér, tgei annadas ch' els giavischan. Sche quei nun daventa, vegn igl archivar a tarmetter in Tschespet niev e quater pli vegls tenor bein apprezziar.

5. Ils della «Guardia» scrivan lur num manu propria el »Cudisch della Guardia» in perpetuam memoriam. Ella gliesta dils commembers della Romania portan els ina steila sil frunt.

Ils della Guardia

ein ils cavaliers de s. Placi, s. Gieri e s. Muzezi, che fan sgulatschar cun slontsch la bandiera della Romania sur la caplutta ed il curtgin de s. Onna cun igl ischi a Trun e viadora ella biala tiara romontscha cun sias pradas e praus, vitgs e marcaus.

* * *

La Guardia della Romania, naschida anno 1924 en igl onn giubilar della Ligia Grischa, ei era ella ina frestga frastga vid nies Ischi. Era ella vul far viva part de nossa organisaziun. Ils statuts sura publicai cloman: Vegni en roschas e carschentei las retschas della Guardia e gidei a far sgulatschar cun slontsch la bandiera della Romania viadora ella biala tiara romontscha!

La Guardia ha els emprems onns rabitschau tochen sin 26 commembers (mira Ischi 1934). Plirs de quels ein gia î sur cuolm, auters han denteren survegniu sien. Denton mo ina cupidada. Oz stat la Guardia puspei allerta pli che zacu cun ses 50 commembers. E nus sperein, en buca ton ditg vegn ei ad esser 100. E quei en l'entira variaziun de nies pievel: dagl uestge cusseglier guvernativ atras tut las clamadas tochen tiel pur e puranchel. A tuts il medem cordial

beinvegni! Era il niev «Cudisch della Guardia» sepresenta vengonzamein per prender en salv ils preziai nums e salvar quels atras ils tschentaners. Nus lessen cun quella caschun — sper il susteniment finanziel — oravon dar peisa alla vart ideala della Guardia: Conta buna lectura romontscha sa entras la Guardia anflar la via en nies pievel! E perquei ha era il «Cudisch della Guardia» raschun de salvar en honor ils nums de quels generus in perpetuam memoriam.

Aunc in pign entruidament. Podà che l' in u l'auter della Guardia ha buc adina caschun u peda de distribuir ils cudischets retscharts. La finamira della Guardia ei naturalmein buca quella de schar far mantun ils cudischets zanua en in encarden — quei fuss in capital miert — mobein de mobilisar quels scazis e far purtar tscheins els en nies pievel, che legia aschi bugen. Perquei lessen nus dir: Tgi che ha danvonz Tschespets ed Ischis, vegli tarmetter quels alla Redacziun dil Tschespet u digl Ischi. Quellas redacziuns han caschun pli che avunda de dar vinavon ils cudischets, per ex. allas scolas, en special quellas dil Grischun central, a nossas tegias ded alp, camonas clubistas etc.

Perquei, romontsch, stai nies lungatg,
Eviva nossa viarva,
Schiditg che sin nos cuolms il matg
Verdegia nova jarva!

Sur Gion Cahannes